

IXCARTA SAN PABLO NIMA CATZOKNILH COLOSENSES

¹ Aquit Pablo tí Dios lilhcanjít naclitanú ixapóstol Jesucristo tí nalichihuínán. Aquit y quintacamacán Timoteo ² ccāmalakachaniyán jaé carto huixín litacamán tí calacsacnítán Dios nalipahuanátit nac cachiquín Colosas.

Quinticucán Dios cacacxilhlacachán y cacamaxquín lipaxáu latámát.

Pablo calipaxahuá tí talipahuán Jesús

³ Acxni ccalíkalhtahuakayán aquín ni climakxtakáu cpaxcatcatziniyáu Dios Ixticú Quimpuchinacán Jesús tú tlahuani milacatacán.

⁴ Porque quincalimakalhchihuiñicanitán la lipahuanátit Jesús ixlihuák minacujcán y la lalakalhamanátit chātunu huixín tí lipahuanátit Dios. ⁵ Huixín acxilhlacachipinitántit amá lipaxáu latámát nima calíkalhipacántit nac akapún. Huixín kalhiyátit namá tapaxahuán porque kaxpáttit tú cāmalacnuní Cristo tí tataxtuniputún.

⁶ Jaé lipaxáu tachihuín tākahuanima canihuá pulataman y tasima la talakxtapalí ixlatamátcán cristianos na chuná la tzucútít tancs latapayátit huixín acxni kaxpáttit la Dios calakalhamanán y xlicana cācxilhlacachinán. ⁷ Huá jaé talacapastaci cāmasinín quintacamacán Epafras. Xlá lhuhua quincamaktayanítán y ní liakatzanká liscuja Quimpuchinacán Cristo, ⁸ y pihuá

quincáhuán í la Espíritu Santo cámaktayanítán nalákalhalhamanátit chátum chátum.

⁹ Láta cticatzíu la lapanántit ní climakxtaknítáu ccalíkalhtahuakayán y cmaksuináu Dios cacamaxquín talacapastacni nacatziyátit la lacasquín nalatapayátit, y ná cacamaxquín lískalala namákachakxiyátit ixtalacapastacni Dios, ¹⁰ xlacata natlahuanátit la cámjiní tí calacsacnít Quimpuchinacán, xlacata nalacputzayátit nalimakapaxahuayátit láta tú tlahuayátit, xlacata nalatlahuaniyátit litlán acxni tú maclacasquín chátum, y xlacata mäs nalakapasátit ixtalacapastacni Dios. ¹¹ Ná cmaksuináu Dios tí kalhí litlihueke, cacamaxquín licamama natalayátit tú ní tlán paxtokátit y mäsqui akxtakajnanátit tlán napaxahuayátit ¹² y napaxcatcatziniyátit Dios porque quincálímakxtaknítán ná nalipaxahuayáu amá lipaxáu putáhuílh nac ixtaxkáket tú cámálacnúninít ama cámáxqui tí calacsacnít. ¹³ Dios quincámaklhtinán ixmacán namá tí ixquincámálamáñimán capaklhtutá y quincayahuán nac ixmacán Ixkahuasa tí lakalhamán, ¹⁴ y quincálakmáxtún acxni nílh nac culus y quincámatzankénanín quintalakalhincán.

Cristo ixlakapuxoko Dios caquilhtamacú

¹⁵ Masqui Dios nítí acxilhnít Cristo Ixkahuasa ixmásuy caquilhtamacú. Xlá lama láta ya tú ixlacatzucú ixlitílanca caquilhtamacú y akapún, ¹⁶ y maktlahuanít láta tú anán nac akapún y nac caquilhtamacú, láta tú liacxiláu quilakastapucán y tú ní acxiláu ná chuná ixpulatamáncán espíritus

tí talamána ixlitilanca caquiltamacú. Xlá catzí ticu t̄acpuxcún, ticu tamāpaksinán, y ticu takalhí litlhueke porque huák maktlahuanít lata tú anán y maklht̄inanít litlhueke huá namāpaksinán.

¹⁷ Cristo ixlamajá antes nalakahuán lata tú anán y cāmaxquí ixlitilhueke natalatamá tatayaní lata tú huí ixlitilanca caquiltamacú y akapún.

¹⁸ Cristo tí cācpuxcún huák tí talipahuán tí talitanú la chatum cristiano y Cristo litanú ixakx̄aka namá cristiano. Xlá pulanít xlahuán lacastacuánalh calinín xlacata nalilacahuananáu siempre tayania nahuán canicxnihuá.

¹⁹ Porque Dios lílhcalh Cristo namasí nac ixmacni huák ixlitilhueke y ixtalacapastacni Dios.

²⁰ Na lílhcalh Cristo nacalacatitayá ixlacatín Dios xlacata ni natajicuán tamālacatzuhuí huák lata tú anán nac akapún y nac caquiltamacú, y xlic̄ana acxni Cristo macamástalh ixlistacií nac culus laccaxtláhualh tl̄an natamālacatzuhuí calitlán cristianos Dios.

²¹ Chí huixín tl̄an lipaxáu malacatzuhuiyátit Dios la amigos m̄asqui xapulh nítú ixlicxilátit Dios nac minacujcán y hasta ixtaralacataquiyátit porque ixtlahuayátit tú ni tl̄an.

²² Pero Cristo cālakatayán acxni litamákxtakli canilh la catihuá chixcu xlacata tl̄an nacāmacamástayán ixmacán Dios huixín tí calacsacnítán nacalimānuyán ixcamán nítú minkasatcán y nítú lipinátit talakalhín.

²³ Huata tamaclacasquiní ni calimakxtáktit canajlayátit y lipahuanátit Cristo, n̄icxni calimakxtáktit acxilh̄lacachipinátit amá tapaxahuán n̄ima calitachihuinancanitántit. Jaé lipaxáu tachihuín lílhcajanít nalichihuínancán caquiltamacú y

aquit Pablo nā quintocárlilh nacmākahuaní.

Tí talipahuán Cristo tacxilhlacachán akapún

²⁴ Cristo akxtakájnalh xlacata tlān naquincalakmāxtuyán aquín tí lipahuanáu y litanuyáu ixmacni, pero aquit nā clipaxahuá ccaliakxtakajnanán porque ccatzí cmakmāspputuma tú mālacatzúquih Cristo. ²⁵ Dios quilílhcalh jaé tascújut, quilimákxtakli naccaliscuján huixín xlacata naccamācxcatziniján ixtachihuín Dios. ²⁶ Lata makán quilhtamacú Dios huí tú ixlaclhcanít pero ní ixcamācxcatzininít cristianos; chí camācxcatzininít tí calacsacnít ²⁷ xlacata natalakapasa namá lanca tapaxahuán níma nā camālacnuní huak tí ní judíos y tlān tapaxahuá namá tí talipahuán Cristo nac ixnacujcán porque tacxilhlacachán ama tatālatamá nac akapún. ²⁸ Aquín ccamācxcatzinijáu cristianos tico Cristo, ccāhuaniyáu lā ixlilatamatcán y ccāmāsiniyáu tú ixlicatzitcán xlacata nacāmaktayá Cristo nac ixlatamatcán, ²⁹ tí aquit cliscuja y ní cliaktzanká porque xlá quimaxquí ixlitlihueke xlacata nactayani.

2

Pablo calikalhtahuaká cristianos xalac Colosas y Laodicea

¹ Aquit clacasquín cacatzítit lā ccalikatzankanítán ccalikalhtahuakayán huixín xalac Colosas y tí talamāna nac cachiquín Laodicea y huak cristianos tí ní quintalakapasa, ní para quintacxilhnít. ² Cmaksquín Dios

cacamáxquín licamama nac minacujcán y para acxtum lalakalhamanátit tlán namacchipiniyátit y makachakxiyátit laclanca ixtalacapastacni Dios y nacatziyátit huanchi lílhcalh Dios Cristo nacalakmáxtuyán. ³ Pues Cristo kahí huák tzék ixliskalala y ixtalacapastacni Dios nimá quincamácxcatzinín.

⁴ Aquit ccakastacyahuamán xlacata nítí nacamakacanajlayán laclán tachihuín tú ni cana; ⁵ pues masqui mákat clama y ni ccacxilhmán aquit ccalilacachanán quintalacapastacni y ccalipaxahuayán acxni ccatzí la titum lapanántit y tancs lipahuanátit Jesús.

⁶ Huixín lipahuanátit Jesús calakmáxtún, pues ni calimakxtáktit lipahuanátit latapayátit la xlá lacasquín, ⁷ tlán cachipaxnántit! Ni calimakxtáktit cacamáhuín na chuná la ixakán aktum quihui ni talimakxtaka cacamáhuilh ixtankáxek namá quihui. Huixín calacputzátit mastacayátit mintalacapastacnicán la camasinicanítantit nalipahuanátit y siempre capaxcatcatzinítit Dios tú tlahuani milacatacán.

Cristo tayánih porque lama xastacnán

⁸ Huixín skálalh calatapátit porque tahuilana tí tamásí tunuj talacapastacni la mililatamatcán y tú mililtlahuacnán. Ni ticákskahuicanátit pues xlacán tamásí tú talacsacxtuní cristianos y tú talismaninit tapuhuán xlicana, pero ni huá tú masí Cristo. ⁹ Huata Cristo tlán litanú xastacnán ixlakapuxoko Dios porque kahí huák ixlitlihueke ¹⁰ y Dios lama nac minacujcán porque lipahuanátit Cristo, tí limakxtakcanít nacpuxcún

huāk mapaksinanín y ixlitlihuekecán espíritus tí talamána ixlitilanca cäquiltamacú y akapún.

¹¹ Acxni lipahuántit Cristo xlá la cacacircuncidarlahuán nalitanuyátit ixcamán Dios camáxtunín tú lixcájnit ixxkalhiyátit nac minacujcán. Huixín ni circuncidarlátit nalitanuyátit ixcamán Dios la judíos tí tachucumakán actzú ixlihuacán, ¹² y acxni lipahuántit Jesús y tákumunútit maknítit ni tlán minkasatcán, litanú la catanítit Cristo y na tälacastacuanántit porque lipahuántit Dios kalhí litlihueke camalacastacuaní nin nac calinín y camaxquí sásti latámat. ¹³ Xapulh Dios nitú ixcalicxilán ixlapañántit la xanín porque ixlipinátit lhuhua talakalhín y ni ixlacputzayátit mäkantaxtiyátit ixley Moisés. Pero xlá camatzankenanín mintalakalhincán y camaxquí sásti latámat tí lipahuanátit Cristo. ¹⁴ Ixlimapaksín Dios huan la ixlilatamatcán ixcamán y tí ni mäkantaxtí ama xokonán, pero matlánih naxapá tú ixliniyáu porque Cristo xokónalh quilacatacán nac culus y aná laclakolh nimá huan nac ixlimapaksín xlacata nataxokonán tí ni tamakantaxtí. ¹⁵ Acxni nilh Cristo nac culus camakatlájalih ixlimapaksincán y ixlitlihuekecán tlajaná y laclixcájnit espíritus tí tatascuja, y camamaxánih ixlitilanca cäquiltamacú pues masqui Cristo nilh nac culus lacastacuánalh calinín.

Lhuhua talichihuínán tú ni cana

¹⁶ Aquit ccáhuaniyán nití cacamakacanajlán tú mas camininiyán mililtahuatcán: para tú

huayátit, para tú kotátit, para tlahuayátit lilakastán, para lakachixcuhuínanátit o acxni lihuancán scujcán tacuhuíní. ¹⁷ Dios mástalh jaé límapaksín xlacata nalilacapastaccán tú ixama min astán, pero como Cristo milhá yaj tú límacuán mākantaxticán. ¹⁸ Huixín ni calitamakxtákit cacákskahuín tí cahuaniyán ni pat taxtuniyátit para ni mākxtakajniyátit mimacnicán xlacata nalakchixcuhuiyátit Dios, o para ni cälakachixcuhuiyátit ángeles. Xlacán talichihuínán tú talimanixnanít y talactlancán tahuán huák tamákachakxí. ¹⁹ Pero ni taliquilhtá Quimpuchinacán Cristo tí litanú xaakxäka tí quincamälaknuyán y quincamähuiyán aquín tí litanuyáu ixmacni xlacata natayaniyáu la laclhçanít Dios.

²⁰ Para huixín tatalakxtumítit Cristo la catanítit y aná laclakolh la namäkantaxtyátit tú talismaninít cristianos tapuhuán xlicana. Para cälakmäxtunítán Cristo, ¿huanchi latiyá tzaksayátit tlahuayátit tú tahuán makapitzi cristianos xlacata nataxtuniyátit? ²¹ Huixín huák calihuanicanátit: “Ni caxamátit tú lixcájnit”, “Ni cahuátit namá tahuá”, “Ni calimaclátit tú ni tlän”, y huixín huák canajlayátit. ²² Pero namá límapaksín cristianos talacsacxtunít, y tú talihuán ni catlahuátit, caj talaclakó acxni camaclacasquincán o cahuacán. ²³ Makapitzi tapuhuán tlän cämäkantaxticán porque quincamaktayayán tziná nalakachixcuhuiyáu Dios la namäkxtakajniyáu quimacnicán o la natluahuayáu lactzu lactzú tú lismaninítáu, pero nitú quincalímacuaniyán nalakxtapaliyáu

quilitamātcán porque ní lá tamālaksputú tú maclacasquín quimacnicán.

3

Tí talipahuán Cristo cataktzónksualh la ixatalmana xapulh

¹ Para huixín lacastacuanántit y maklhtinántit səsti latámat acxni lipahuántit Cristo acxilhlacachipinátit lipaxáu latámat nac akapún ana ní lama Cristo, pues xlá huí ixpaxtún Dios tamāpaksinama. ² Huixín cäcxilhlacachipítit tú pət maklhtinanátit nac akapún y ní caliakatzankátit tú nakalhiyatit cäquilhtamacú.

³ Pues huixín maknítit ní tlən minkasatcán y lacastacuanítantit xlacata Dios nacāmaxquiyán səsti latámat con Cristo. ⁴ Porque Cristo calakmaxtunítán y acxni namín ixlimaktuy huixín pət limālacahuəninanátit ixlilanca ixlitlihueke.

⁵ Huá ccālihuaniyán calimakxtáktit tú ní tlən tlahuayátit cäquilhtamacú: tí tamakaxtoka ní catakskáhuilh ixtachatcán o ixtakolucán, ní catlahuátit tú lixcájnit, ní huata calipuhuántit la napaxahuayátit, y la nalitlahuayátit talakalhín mimacnicán, ní para huata calipuhuántit tú nakalhiyátit cäquilhtamacú pues quītaxtú la calimānútit ixlakapuxoko Dios tí nalakachixcuhuiyátit cäquilhtamacú, ⁶ y Dios ní cäcxilhputún tí chuná talamana, ama cāmaxokoní tí takaxmatmakán tú limāpaksinán. ⁷ Milh quīlhtamacú huixín chuná jaé ixlapañanátit, ⁸ pero chí calimakxtáktit tú ní tlən ixtlahuayátit, yaj calamakasitzítit, yaj calamāklhuhuətnítit,

yaj calataraſsláktit, yaj calalíkalhkamánántit, ni para calahuanítit laclíxcájnit tachihuín,⁹ ni para calákskahuítit. Huixín chá catzaksátit maxtuyátit nac minacujcán namá lixcájnit minkasatcán nimá ixkalhiyátit,¹⁰ y camanútit sásti lipaxáu latámat nimá camáxquiniítán Dios xlacata mas tlán nalhkamayátit ixkásat Quimpuchinacán tí malakachanít Dios, pues xlá ni ama limakxtaka camaktayayán.

Dios quilhpaxtum calakalhamán cristianos

¹¹ Chí yaj tú limacuán lactlancancán, la judío y la tí ni judío, la tí talismaninít tamákantaxtí ixley Moisés y la tí ni talismaninít tamákantaxtí, la tí luhuanán y la tí ni tataxtunit ixpulatamancán, la tí libres talamána y la tí cátamahuacanít camascujucán, porque Cristo quilhpaxtum cäcxilhlacachán y huák tlán tamaklhtinán. ¹² Dios calacsacnítán xlacata nacalakalhamanán, huá ccálihuaniyán camásítit lalakalhamanátit, lasipacxilátit, ni lactlancanátit, acs tamakxtakátit, ni sok sitziyátit. ¹³ Calapatínít tú lałlahuaniyátit y camatzankenanítit tú lałimakasitziyátit chatum chatum, na chuná la Cristo camatzankenanín tú ixtlahuanítántit, jhuixín camakslihuekétit! ¹⁴ Pero mas calacputzátit lalakalhamanátit porque tí taralakalhamán tamakachakcí ixtalacapastaci Cristo y taralícxila la litacamán. ¹⁵ Cristo cacamáxquín lipaxáu calitlán latámat nac minacujcán, porque Dios calacsacnítán nalitanuyátit ixmacni Cristo. ¡Ni calimakxtáktit paxcatcatziniyátit tú tlahuanít milacatacán!

Chatunu cascujli ixlihuak ixnacú

16 Huixín ní caktzonksuátit ixtachihuín Cristo nac minacujcán xlacata tancs nachihuinanátit acxni tú nacámásiniyátit o nacámáxquiyátit licamama xamakapitzi. Huixín capaxcatcatzinítit Dios tú tlahuayátit, catlítit salmos, himnos y alabanzas xlihuak minacujcán. **17** Acxni tú tlahuayátit o huanátit, calacpuhuántit Cristo camapaksinitán y capaxcatcatzinítit Dios tú tlahuanít Cristo milacatacán.

18 Lacchaján tí tamakaxtoka, catakáxmatli ixtakolucán porque Quimpuchinacán chú lakatí lacaſquín ní catarámakasítzilh. **19** Lacchixcuahuín tí tamakaxtoka, catalakalhámalih ixtachátcán ní huata catataránieli.

20 Xacamánán tí takalhí ixticucán, catakáxmatli tú talimápaksinán porque chú lakatí Quimpuchinacán. **21** Xanaticún tí takalhí ixcamancán, ní huata catakahuánilh ixcamancán xlacata ní natalipuhuán tú catlahuanicán.

22 Tasacua, catakáxmatli tú talimápaksinán ixpatroncán juú cäquilhtamacú, ní huata acxni cäcxilhmaça xlacata ní nacakahuanicán. Catáscujli ixlihuak ixnacujcán lä cacamaktákhli Dios. **23** Acxni tú tlahuayátit lipaxáu cascújtit, ixlihuak minacujcán, lä caliscújtit Quimpuchinacán, ní capuhuántit caliscujpanántit cristianos. **24** Porque Quimpuchinacán Jesucristo ama cámaxquiyán minataxokoncán níma malacnunít ama cámaxquí tí takaxmata taliscuja lä huixín. **25** Pero tí tlahuá tú ní tlan na ama xokonán tú tlahuanít porque xlá acxtum calicxila cristianos.

4

¹ Huixín patrones, nā chuná tlān cacatzítit y ní calimahuacátit cāmāscujuyátit mintasācuacán. Ní cāktzonksuátit xlacata huixín nā kalhiyátit chātum tí cācpuxcunán nac akapún.

*Pablo cāmaksquín cristianos
catalíkalhtahuákalh*

² Aquit ccāmaksquinán ní calimakxtáktit kalhtahuakaniyátit Dios, skálalh calatapátit paxcatcatzinipanántit Dios tú tlahuá milacatacán.

³ Nā ccāmaksquinán caquilalíkalhtahuakáu xlacata Dios naquincalinán ní tahuilána cristianos tí tamālacqui putún ixnacujcán xlacata naclīchihuinanáu lā Cristo tlān calakmaxtú cristianos. Aquit ní caktzonksuá caj huá jaé xlacata clītanúma nac pulachín, ⁴ pero camaksquíntit Dios quimáxqui lh lícamama tancs nacchihuínán lā quimininí.

Pablo cāmalakachá Tíquico y Onésimo nac Colosas

⁵ Litācamán, huixín calacputzátit lā cātāchihuinanátit tí ní talipāhuán Cristo, ní chūta camakatzankátit quilhtamacú. ⁶ Calīchihuínántit tú tlān lā cāmininiyán, ní calimahuacátit huanátit tú ní cāmininiyán, pero lā acxni māskokecán tahuá xlacata kama nahuán tlān nacākalhtiyátit tú cākallasquiniyán cristianos.

⁷ Chí ccāhuaniyán cama cātamālakachānayán jaé carta quintācamcán Tíquico tí clakalhamán porque quimaktayanít y ní litzonkcatzanít līscuja Quimpuchinacán. Xlá ama cāhuaniyán lā clama, ⁸ y ama calitāchihuinanán tú ctlahuanítáu

y xlacata nacamaxquiyán licamama nac minacujcán. ⁹ Nā natqanachá quintacamcán Onésimo, xlá ixlama nac mimpulatamancán y nā chuná clakalhamán lā quintascujnít. Lāta tú catziputunátit xlacán ama cahuaniyán.

Pablo calacapastaca ixamigos

¹⁰ Chatum quiamigo tí nā tanuma nac pulachín huanicán Aristarco cahuaniyán kalhén. Nā chuná ixprimo Bernabé huanicán Marcos ccatzí calitachihuinancanítantí jaé kahuasa, para calakanachán lipaxáu catalatapátit. ¹¹ Nā cahuaniyán kalhén Jesús (nā līlakapascán ixtacuhuín Justo). Huata jaé lacchixcuhuín judíos tí talipahuán Jesús y quintatamakahuanínít ixtachihuín Dios, y ccápaxcatcatziní lā quintamaxquínít licamama.

¹² Nā cahuaniyán kalhén chatum xalac mimpulatamancán liscuja Jesús huanicán Epafras. Xlá ni caktzonksuayán y siempre calikalhtahuakayán ixlihuak ixnacú xlacata ni naktzankayátit y nalacputzayátit tlahuayátit tú lacaquín Dios. ¹³ Aquit tlan cmaluloka lā calipuhuanán nítú napaxtokátit huixín tí lipahuanátit Cristo nac Colosas, nā chuná tí talamána nac Laodicea y nac cachiquí Hierápolis.

¹⁴ Nā calacapastacán namá doctor Lucas tí huák lakalhamanáu y nā cahuaniyán kalhen chatum quintacamcán huanicán Demas.

¹⁵ Aquit ccälacapastaca quintacamancán tí talamána nac Laodicea. Nā cahuanítit kalhén quilakapuxoko namá quintacamancán Ninfas y tí tatamatoksta nac ixchic.

16 Acxni nalikalhtahuakakoyátit jaé carta cacamalakachanítit tí talipahuán Cristo nac Laodicea xlacata ná natalikalhtahuaká, y huixín ná nalikalhtahuakayátit aktum quincarta njimá ama tamalakachá xlacán.

17 Cahuanítit quintacamcán Arquipo xlacata cmalakachaní tachihuín ni calimákxtakli makantaxtí ixtascújut njimá mamacquinít Quimpuchinacán.

18 Aquit Pablo, chí quimacán y quiletra cama litzoka tú cama cahuaniyán. ¡Ni caktzonksuátit xlacata ctanuma cpulachín! ¡Dios cacacxilhacachín huak huixín! Chuná calalh, amén.

**Xasasti talaccaxlan
New Testament in Totonac, Papantla (MX:top:Totonac,
Papantla)**

copyright © 1979 Wycliffe Bible Translators, Inc.

Language: Totonac, Papantla

Translation by: Wycliffe Bible Translators, Inc.

Totonaco, Papantla [top], Mexico

Copyright Information

© 1979, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Totonac, Papantla

© 1979, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

d7f00541-cd76-5250-8a0c-0eed9531b7c0